

Obraćanje visokog predstavnika, Christian Schwarz-Schillinga na promociji brošure “Regionalni ekonomski razvoj-Priča o uspjehu u BiH”

U organizaciji Evropske komisije

Bolje poslovno okruženje znači više radnih mjesta

Dame i gospodo,

Zaista mi se sviđa naziv pod kojim se organizira ova promocija. Organizirana je u cilju prezentiranja pozitivnih primjera i uspjeha ostvarenog u okviru regionalnog ekonomskog razvoja.

Drugim riječima, u fokusu su pozitivni rezultati.

U politici smo vrlo često preopterećeni *procesom* i gubimo iz vida rezultat koji se želi ostvariti. Privrednici su ipak daleko izravniji i rezultat koji oni žele ostvariti je jasniji: uspješno vođenje preduzeća, zadovoljni klijenti, zadovoljni zaposlenici i ostvaren profit.

Drago mi je što sam danas ovdje s vama gdje se razgovara o uspjehu i pozitivnim primjerima ekonomskog razvoja. Razmatramo činjenice koje su pozitivne, ali u ovoj eri komunikacija o činjenicama nije dovoljno samo govoriti, nego ih treba i objaviti. U suprotnom, niko ne bi znao ništa o pozitivnim stvarima koje se događaju.

Razumijem i poznajem izazove s kojima se treba suočiti ukoliko se želi osigurati uspjeh u svijetu poslovanja. Mnogi ovdje znaju da sam svoju karijeru započeo kao poduzetnik u malom porodičnom preduzeću koje je, s ponosom mogu reći, preraslo u preduzeće srednje veličine. Politici sam se okrenuo tek u kasnijoj fazi svog života.

Postoji nešto što sa potpunom sigurnošću mogu tvrditi: uspješno poslovno okruženje samo po sebi ne vodi prosperitetu, nego samo stvara okvir u kojem poduzetnici mogu osigurati prosperitet.

Ovo je lekcija koja se još uvijek uči ovdje, u Bosni i Hercegovini.

Jedini način na koji se može osigurati otvaranje desetina hiljada radnih mjesta i brže poboljšanje životnog standarda je putem iskorištavanja latentne snage bh. poduzetništva.

U adekvatnom poslovnom okruženju preduzeća mogu nastaviti s zapošljavanjem.

Moj ured je u potpunosti podržavao Projekat Regionalnog ekonomskog razvoja Evropske unije (RED). Zapravo, prije nekoliko sedmica smo ambasador Humphreys i ja, zajedno s mojim prvim zamjenikom Larry Butlerom, imali dug i produktivan sastanak s predstavnicima pet regionalnih razvojnih agencija na kojem smo od njih saznali nešto više o načinu na koji im možemo pomoći.

Vrlo mi je drago što sam čuo da će se Projekat «RED II» fokusirati na razvoj malih i srednjih preduzeća.

Formiranje Vijeća za poduzetništvo i razvoj, pod okriljem Vijeća ministara, u cilju jačanja i koordiniranja strategija malih i srednjih preduzeća i okupljanja svih agencija koje djeluju u ovom sektoru je odličan prijedlog koji će uživati punu podršku OHR-a i Ureda specijalnog predstavnika EU.

Smatram da razvoj malih i srednjih preduzeća predstavlja osnovni faktor svake moderne ekonomije. Mala preduzeća mogu ponuditi poduzetništvo i inovacije, mogu formirati nove proizvode i vrlo se brzo prilagoditi novim uslovima. Stoga organi vlasti moraju stvoriti uslove u kojima se mala i srednja preduzeća mogu razvijati.

Pozitivan rezultat ovog projekta se po mom mišljenju može opisati u samo tri riječi: nova radna mjesta, nova radna mjesta i opet nova radna mjesta.

Hvala.